

## Tutu é kuvi ũun e táxnũu San Juan

*Ña é kãta'xi ntuvi iña ko*

<sup>1</sup> I'a ntaa ntí ni ntõ iñá Cristu, ña é dukuãn tuvi dá iñi ntu'u ñuxiví sa. Tèkú nti iña ñá ne, Iní nti ña nuu mií nti di. Īto nteé nti ña ne, tiin nta'ã ntí ña di. Ña sá'ã ne, ña é kãka'an o e Tú'un Xuva kō, ña e tá'xi ntuvi iña ko. <sup>2</sup> Tsi tá'xi Xuva kō é kīnī nti ña kata'xi ntuvi iña ko. Iní nti ña ne, kaka'án nti ni ntõ é nuu é ntaā i iña ña. Kaka'án nti ni ntõ ve iña ña'a san, ña kata'xi ntuvi iña ko é ña kantí'i. Tsí dukuãn tuví ña ni Xuva kō nte ntúvi dí'na ne, tá'xi Xuva kō é kīnī nti ña. <sup>3</sup> Kaka'án nti ni ntõ nee iña é ini ntí, nee iña e téku ntí, vata koo é kuédadii tsi nima nto ní nti vata tsí ó e kuédadii tsi nimá nti ni Xuva ko ni I'xã ñá Jesucristu. <sup>4</sup> Sá'ã é kãka'u ntí iña ntó vata koo é kuntõo díni kue'en ntó nī nti.

*Ñá te neé te nĩñú Xuva kō*

<sup>5</sup> Tú'ũn sa'á nañé'e Jesucristú nti ne, kaka'án nti ni nto vē. Vá'ã kue'en Xúva kō. Ña túvī nee iña é kīnī kaa iña ña. <sup>6</sup> Tē ntáka'an o tsí dadii tsi o ni ñã ntá tsi ntáde o é kīnī kaa ne, ntáka'an ó dovete; ñá tē nuu é ntaā i e ntáde o é vatā ó ntio Xuva kō. <sup>7</sup> Ntá tsi te vīi o é vā'á vatā ó de Xuva kō ne, kuédadii tsi nima ko ni ta'an ko un ntíi ntīi o. Kidáã ne, nĩñi I'xã ñá Jesucristu kanakate kuétsi kō.

<sup>8</sup> Te kã'an o tsí ña tuvi kuétsi kō ne, ntaéni nta'ví mii o kúñu kō. Ñá ntántikīn ntí'xe o itsi Xuva kō. <sup>9</sup> Te kã'an o ni Xuva ko tsi íõ ntí'xe kuétsi kō ne, ini o tsi vií ña é vā'á ne, kada ka'nu iní ña ni ko kuétsí kō. Nakate ña nima ko é un ntí'í é kīnī kaa san. <sup>10</sup> Te

kā'an o tsí ña tuvi kuétsi kō ne, vata tē ntáka'an o tsí vete Xuva kō. Ña ntákuinti'xe ko tū'un é kākā'an ña.

## 2

### *Kanada'ān Cristu ko*

<sup>1</sup> I'xá mii ko, i'a kaka'án u ni nto sā'a vata koo é ña vií nto é kīni kaa. Ntá tsi te vīi o é kīni kaa ne, ió xoo é nada'an i kō nuu Xuva ko. Jesucristu ña ne, vá'ā kue'én ña. <sup>2</sup> Tsi ntá'vi Jesuu iña kuétsi kō da éti ña niñi ña ntíkā krusi kan. Nǎ te da mii tsi iña kuétsi mii kō, tsí iña kuétsi e ntáde un ntíí ntíí ña ntoo ñuxiví sa.

<sup>3</sup> Kutuni kō tsí ini ntí'xe o Jēsuu te ntáde ntaa o é kākā'an ña é vīi o. <sup>4</sup> Xoó ña'a é kākā'an ña tsí ini ñá ña, ntá tsi ña káde ntaa ña é kākā'an ñá ne, da mii kuē'en tsi é kākā'an ñá dovete. Nǎ ĩni ka'án ña é nuu é ntaā i. <sup>5</sup> Ntá tsi xoo ñá'a é káde ntaa ña é kākā'an Xúva kō é vīi ó ne, kakuinima ntí'xe ña Xuva kō. Dukuan ō kútuni ko te i'xa é kāduku ntée ntí'xe Xuva kō. <sup>6</sup> Xoó ña'a é kākā'an ña tsí uun tsi nima ñá ni Xuva kō né, na vii ña é vā'á vatā o dé Jesuu.

### *Tū'ún xee é kākā'an Xúva kō é vīi o*

<sup>7</sup> Ntō'o, tá'ān ko e dóo ntio ko, ñá te nūu i é xeé san é kākā'án nti ni ntō. Kaka'an xtúku ntí ni nto nūu i é ĩni nto nte ntúvi di'na. Tū'ún san e téku nto kídaā ne, sá'a kākā'an xtúku ú ni ntō. <sup>8</sup> Ntá tsi i'a kade vá'a ú uun tū'ún xee é nuu é ntaā i iñá Cristú ne, iña ntō di. Tsí kaita nti'xin é kīni kaa san tsi é xee nuu i é nuu é ntaā í, vatā ó kaita nti'xin é nēé san dá kākene ngántíí san.

<sup>9</sup> Te iō ntó ntáka'an ntó tsi ntaíka nto mí kǎxi'í ne, ntá tsi ntákune'u iní nto ni tā'an nto ne, vata te ntaíka dukuan ntō mi é nēe. <sup>10</sup> Xoo e ntákuinima í ta'an í ne, vata tē ntoo ña mi é kǎxi'í. Nǎ ntō ká ña

víi ña nuu i é kīni kaa. <sup>11</sup> Ntá tsi xoo e ntákune'u iní i ni tā'an í ne, vata te ntaíka dukuan ñā mi é nēe. Ña ini ña nté koo víi ña, tsí vata tē ña kaxí'i nuu ña mí'i kī'in ña, tsi dóo nee.

<sup>12</sup> Kaka'án u ni nto, í'xa, tsi e dé ka'nu iní Xuva ko kuētsí nto tsí xi'i Jéssu kuénta iña nto. <sup>13</sup> Kaka'án u ni nto, ūva, tsí ini nto ña é tuví di'na da iñi ntu'u ñuxiví sa. Kaka'án u ni nto, na kuētsi, tsi e kúvi idé nto nī tó'ō e ña vá'ā san.

Kaka'án u ni nto, í'xa, tsí ini ntó Xuva kō. <sup>14</sup> Kaka'án u ni nto, ūva, tsí ini nto ña é tuví di'na da itúvi ñuxiví sa. Kaka'án u ni nto, na kuētsi, tsi dóo iō ntíi ntō, tsí ini va'á nto tú'un Xuva kō ne, e kúvi idé nto nī tó'ō e ña vá'ā san.

<sup>15</sup> Ñá ku kuiníma ntó nuu i é kīni ntáa san é iō ñuxiví sa; ntē ña ku dé kuení nto é víi nto é kīni kaa vatā ó de ña'a, ña é ña ntákuinti'xe i san. Xoo é kákuinima í nuu i é kīni ntáa san é iō ñuxiví sa ne, ñá kákuinima ñá Xuva kō. <sup>16</sup> É un ntí'i nūu i é kīni ntáa é iō ñuxiví sa ne, ñá te nta'a Xuva ko vē'xi, tsí i'a tsi kíi mii ñuxiví sa. Nee iña é ntio nima kīni kaa ko, nee iña é kīni kaa é koto ō, nee iña é káde i é víi o e dóo ka'nu ña'a o ne, sá'ā é káta'xi ñuxiví sa. <sup>17</sup> Kué'en kántí'i ñuxiví sa nī é un ntí'i nūu i é kīni ntáa. Ntá tsi xoo ñá'a é káde ntaa ña é ntio Xuva kō ne, kutuví ñá ni Xuva ko ntii dañu ntūvi.

*Nee é nuu é ntaā i ne, nee é dovete*

<sup>18</sup> Í'xá mií ko, dokó sa ntí'i ñuxiví sa. Tēkú nto tsí ki'xi uun ña'a, ña kada ne'u iní nī Cristu. É tītín ña xée ñá ve. Dukuān ne, kutuni ko tsí dokó sa ntí'i ñuxiví sa ve. <sup>19</sup> Ña kuān ntáa sán ne, kīi nteé xio ña kō, é dadíi ika o ni ñā, tsí ña te kuédadíi nima ñá ni kō. Tē dí uun tsi nima ñá ni kō né, kuan tsí o ntaíka dadíi o ni ñā. Ntá tsi kīi nteé xio ña kō vata koo é tidito tsí ña te iña ko ña é un ntí'i ñā.

<sup>20</sup> Ntá tsi Jesuú ne, tã'xi ña Espíritū Sántū é kunūu ña nima ntó vata koo é kūtuni ntó nee iña é nuu é ntaā í iña ña. <sup>21</sup> É kuān ó kaka'u ú ne, ñá te kaká'an u é ña ini nto nee iña é nuu é ntaā i, tsí ini vá'a nto. Da neé ka dovete ne, é ini nto tsí ña te nuu é ntaā i. <sup>22</sup> ¿Xoó ntu e dóo vete í? ¿Ñā ntu te ña é kākā'an tsí Jesuú ne, ña te dívi ñā é taxnuu Xuva kō? Ña kuān ntāa sán ne, kade ne'u iní ña nī Cristu, tsí kaka'an ña tsí ña te nuu é ntaā i é dadii Xuva ko ni I'xā ña. <sup>23</sup> Xoó ña'a é kākā'an ñá tsi Jesuú ne, ña te dívi ñā é taxnuu Xuva kō ne, ñá ini ña xoo é Xuva kō di. Ntá tsi xoó ña'a é kākā'an ñá tsi táxnuu nti'xe Xuva ko I'xā ñá Jesuú ne, ini ñá Xuva kō di.

<sup>24</sup> Dukuān né, xnūu nto nima nto tú'ūn e téku nto dí'na. Te naka'ān ká nto tú'ūn sa'á ne, kuvi uun tsi nima ntó ni Xuva ko, ni I'xā ña. <sup>25</sup> Jesucristú ne, xé'e ñā xu'u ña tsí ta'xi ña ntuvi vā'á iña ko ntii dañu ntúvi.

<sup>26</sup> Kaka'án u ni nto sã'a tsí iō ñá'a é ncho kani nta'ví ña nto. <sup>27</sup> Ntá tsi é nī'i nto Espíritū Sántū sán ne, ñá kantō é nakuā'a tuku ña'a nto. Tsi e tá'xi Jesūcristu Espíritū Sántū sán ne, divi ña kanañē'e ñá nto é un nti'í. Ñá tē dovete kaká'an ñá ni ntō, tsí nuu é ntaā i. Kuntoo dadii nto nī Cristu, vātā ó kanañē'e Espíritū san nto.

<sup>28</sup> Kaka'án u ni nto ve, í'xá ko, te kuntoo dadii nto nī Cristu vata koo é tē ntii díto ña ne, kunteē ini ko ña, ñá te kūka'an nuú ko ña tē xee ña kidaā. <sup>29</sup> Ini ntó tsi dóo va'á Xuva kō. Dukuān né, da xōó ka ña'a é kāde ña é vā'á ne, divi ñā é í'xá nti'xe Xuva ko ña.

### 3

*I'xa e ntáduku ntée Xuva kō*

<sup>1</sup> Koto nto nté ntu kaa dii kakuinima Xúva ko kō, tsi tá'xi ña é kuvi o i'xā ñá ne, i'xá nti'xe Xuva kō kúvi o. Ña é ña ntákuinti'xe i Xuva kō ne, ñá ñni ñá xoo ñá'a o, tsí nte ñá ñni ñá xoo é Xuva kō di. <sup>2</sup> Ntō'o tá'an kó e dóo ntio kó nto, é i'xá Xuva kō kúvi o vevíí ne, váta kutūni kó nee ñá ntu ntuvi o ve tē kúvi, ntá tsi ñni o tsí te ntīi díto Jesuú ne, ntuvi o vata kaa ña di. Tsí kidáa ne, kini o ña nté kaa ña. <sup>3</sup> Un ntíí ntíí ña'a, ña ntantétu Jesuú ne, ñá vīí ka ña é kīni kaa, tsí Jesuú ne, dōo va'á ña ne, ña túvi kuētsí ña.

<sup>4</sup> Un ntíí ntíí ña'a, ña é ncho vii kuetsi sán ne, ña ntáde ntaa ña é kāka'án lei ña Xuva ko. Iō kuetsí ko tē ña ntáde ntaa o é kāka'án lei san. <sup>5</sup> Ñni ntó tsi vé'xi Jesuú vata koo é nakuitā ña kuetsi kō. Jesuú ne, ña túvi kuētsí ña nté un siin. <sup>6</sup> Xoó ña'a, ña é kanuu iní i ña ne, ña ncho vii ka ña é kuētsí san di. Xoó ña'a, ña é da mií é kāde kuētsí sán ne, váta kinī ñá Jesuu. Ntē ñá ñni ña xoo é Xuva kō di. <sup>7</sup> I'xá mií ko, ñá kū da vá'a nto é kāni nta'ví ña'a san nto. Xoó ña'a, ña é kāde é vā'á ne, vá'a nti'xe ña vata kaá mií ña. <sup>8</sup> Ntá tsi xoo ñá'a, ña é kāde kuētsí sán ne, kaduku ntée ña e ña vá'a san. Tsí nte dí'na ede tó'ō e ña vá'a san é kīni kaa. Dukuān é vē'xí I'xá Xuva ko ñūxiví sa vata koo é nantí'i ña nuu i é kāde tó'ō e ña vá'a san.

<sup>9</sup> Xoó ña'a é nakáku Xuva kō ne, ñá ncho vii ka ña é kīni kaa, tsí nuu Xuva kō nima ña. Ña kúvi vīí ka ña é kīni kaa, tsi é nakáku ña nta'a Xuva kō. <sup>10</sup> Dukuān ne, kutuni ko neé i'xa é káduku ntée Xuva kō ne, neé i'xa é káduku ntée tó'ō e ña vá'a san. Xoó ña'a é ña káde é vā'á ne, ñá te i'xa é káduku ntée Xuva kō. Ntē ña'a, ña é ña kákuinima í ta'an i ne, ñá te i'xa é káduku ntée Xuva kō.

### *Kuinima kó ta'an kō*

<sup>11</sup> Sá'a tū'un e téku nto nte ntúvi dí'na: é na kuñima kó ta'an kō. <sup>12</sup> Ñá vīi o vata o dé Caiin, ña

é ede é kīni kaa san, tsí é'ni ña ení ña. ¿Nté kui é'ni ntu ña ení ña? Tsí Caiín san ne, dōó kīni o dé ña ne, ení ña ne, dōo vá'ā o dé ña.

<sup>13</sup> Ñá ku kunti'i ini nto, tā'an kó, tē ntaínchu'vi ña'a ñuxiví sa nto. <sup>14</sup> Ini o tsí xo'ō ne, ñá nī'í ka ko doxi'í san tsi e nī'í ko ntuvi vā'á iña kó ve. Kutuni ko sá'ā, tsí ntákuinima kó ta'an kō. Xoó ña'a é ña kákuinima í ta'an i ne, kuan tsí koo kuví ña ni kuētsí ña. <sup>15</sup> Xoó ña'a, ña é ña ntío kue'en tsí i ta'an í ne, vata kaa ña é kaē'ní ña'a kaa ña nuu Xuva ko. Ini nto tsí xoo ñá'a é kaē'ní ña ña'a ne, ña kúvi nī'í ñá ntuvi va'á iña ña ntii dañu ntúvi. <sup>16</sup> Kutuni ko nté koo kuinima ko, tsí Cristú ne, xé'e ña ntuvi iña ña é kuví ñá kuenta iña ko. Dukuan xo'ō dí ne, nakuē'e ó ntuvi iña ko kuenta iña ta'an ko. <sup>17</sup> Xoó ña'a e dōo iō iña ñá ne, kakutuni ña tsí ió ta'an kō, ña é kakunaá ntee í ne, te kāde víi ini ña é kué'é ña ne, ¿mí'í ntū nuu é ntaā i é kákuinima ñá Xuva kō? <sup>18</sup> I'xá mií ko, ñá te da mií tsí rki xaa ko kunteku é kāka'an o tsi dōo kuinima kó Xuva kō, tsí na kuínima ntí'xe ko ñá né, na vīi o é vā'á ni ta'an kō di.

### *Koo ntaá iní kō nuu Xuva ko*

<sup>19</sup> Dukuān é kūtuni ko tsí xo'ō ne, ntántik'in o é nuu é ntaā i. Dukuān ne, nakunuú ka'nu nima kó nuu Xuva ko. <sup>20</sup> Tē ntáde kuení ko té ña vá'a nima kó ne, Xuva kō ne, ini ña nté o ntí'xe nima ko, tsi díi ka ka'nu ña ne, ini ña é un ntí'í. <sup>21</sup> Ntō'ó ta'an kó e dōo ntio kó, te inī o tsí ña tuvi kuétsi kō ne, ñá kūka'an nuu ko é xēe étsin o nūu Xuva ko. <sup>22</sup> Dīvi ñá ne, ta'xi ña da nēé ka nuu i é kākan o nta'a ña, tsi ntákuinti'xe ko tū'un é kāka'an ñá ne, ntáde o nee iña e ntío ña. <sup>23</sup> Sá'a kāka'an ña é vīi o: é kuinti'xe ko I'xā ñá Jesucristú ne, kuinima ko ta'an ko, vatā ó kaka'an ña. <sup>24</sup> Da xōó ka ña'a, ña é ntáde ntaa é

kāka'an Xúva kō ne, ntákudadii ña ni Xuva kō. Nuu mé'ñu Xuva ko ñā di. Dukuān ini o tsí nuu mé'ñu Xuva ko kō, tsí e tá'xi ña Espíritū Sántū san é kunūu ña nima ko.

## 4

*Espíritu Xuva ko ni ěspíritū ña é kāde ne'u iní i nī Cristu*

<sup>1</sup> Ntō'o tá'ān kó e dóo ntio ko, ñá ku kuinti'xe nto da xóo ka ña'a, ña é kāka'an tsí kantikin ña tú'un Xuva kō. Koto nteé va'ā ntó ña vata koo é kūtuni ntó tē nuu é ntaā í é kantikin ñá Xuva kō. Tsí ña te da díi ña vete ntaika ña ñuxiví sa. <sup>2</sup> Dukuān é kūtuni nto xoo é nūu Espíritū Xuva kō nima i: xoo é kāka'an i tsí nuu é ntaā í tsi kí'xi Jesucristu ñuxiví sa é nī'i ña kúñū é vata kaa ñatíi san ne, kaduku ntée nti'xe ña Xuva kō. <sup>3</sup> Xoó ña'a é ña kuān ó kaka'an iña Jesúsú ne, ñá kaduku ntée ña Xuva kō. Ña kuan ntāá san ne, kaduku ntée ña ña kainchu'ví Cristú san. É tēkú nto tsí ki'xi ña sa'á ne, é tuví ña ñuxiví sa vevii.

<sup>4</sup> I'xá ko, ntáduku ntée nto Xuva kō ne, é kūvi ide ntó ni ña vete kuān ntāa san. Tsí divi ñā é nūu ña nima ntó ne, díi ka ka'nu ña é vāta kaa é nūu nima ñá ntáduku ntée ñuxiví sa. <sup>5</sup> Ña ntáka'an dóveté san ne, da mii ñuxiví sa vé'xi ña. Nee iña e ntáka'an ñá ne, iña ñuxiví sa di ne, dukuān ntaíni ña ñuxiví sa ña. <sup>6</sup> Xo'ō ne, ntáduku ntée o Xúva ko. Xoó ña'a é ini ña Xúva kō ne, kaini ña tú'un kō. Xoó ña'a, ña é ña kaduku ntée Xuva kō ne, ñá kaini ña tú'un kō. Dukuān ne, kutuni ko xoó kaka'an i é nuu é ntaā i, xoo é kāka'an í dovete.

*E dóo kuínima Xúva ko kō*

<sup>7</sup> Ntō'o tá'ān ko e dóo ntio kó, na kuínima kó ta'an kō xé un xé un o. Tsí Xuva kō tá'xi ña nté koo kuínima kó ta'an kō. Xoó ña'a é ini kuínima ñá

ta'an ña ne, i'xa é kāduku ntée Xuva ko ñā. Ini nti'xe ñá Xuva kō. <sup>8</sup> Xoó ña'a, ña é ña íni kuinima í ta'an í ne, ntē ñá ini ñá Xuva kō di. Tsí Xuva kō ne, dóo kuínima ña. <sup>9</sup> Nāñē'e Xúva ko kō tsi dóo kuínima ñá kō e táxnū ña I'xá mii ña ñūxiví sa vata koo é nī'i ko ntuví va'á iña ko kuenta iña ña. <sup>10</sup> Dukuān né, kūtuni ko tsi dóo kuínima ñá kō, tsí kuān té ña ni kuiníma ko ña kídaā ne, di'na ña kuínima ñá kō ne, taxnū ña I'xá ña vata koo e ntá'vi ña kuétsi kō da eti ña niñi ña kuénta iña ko.

<sup>11</sup> Ntō'o e dóo ntio kó ne, dōo kue'e kuínima Xúva ko kō ne, kuan koo na kuínima kó ta'an kō di. <sup>12</sup> Xuva kō ne, nté uun ña'a vata kiní ña ña. Ntá tsi te kuínima kó ta'an kō ne, nuu mé'ñu Xuva ko kō. Kídaā ne, kuinima nti'xe ko vatā ó kuinima Xúva ko kō. <sup>13</sup> Ini o tsí nuu mé'ñu Xuva ko kō ne, uun tsi kúvi o ni ñā, tsí e tá'xi ña Espíritu ñā é kūnuu mé'ñu kunuu dava ña kō. <sup>14</sup> Nti'í ne, iní nti ne, ntáka'án nti tsi táxnuu Xuva ko I'xá ñá vata koo é nakáku ña ña ntántoo ñuxiví sa. <sup>15</sup> Da xōó ka ña'a é kāka'an ña tsí Jesuú ne, I'xá mii Xuva ko ñā ne, nuu mé'ñu Xuva ko ñā ne, uun tsi kúvi ña ni Xuva kō.

<sup>16</sup> Nti'í ne, é kūtuní nti ne, kakuinti'xe nti tsí Xuva kō né, dōo kuínima ñá kō. Dōo ini kuiníma Xúva kō. Xoó ña'a é ini kuiníma ñá ta'an ñá ne, uun tsi kúvi ña ni Xuva kō ne, nuu mé'ñu Xuva ko ñā. <sup>17</sup> Kuān koo kutú've kō é kuinima kué'en ko ta'an kō vata koo é ña u'ví ko tē xee ntúvi é kā'an Xúva ko xoo é vā'a í ne, xoo é ña vá'a i iña ñá ntántoo ñuxiví sa. Tsi é kutú've kō é kuínima ko ta'an ko ñuxiví sa vatā ó kuínima Xúva ko kō. <sup>18</sup> Xoó ña'a é ini kuiníma ñá ne, ñá kau'vī ña. Tē nuu é ntaā i é íni o é kākuinima nti'xe kō ne, ña túvī nee iña é kau'vi ko. Dōo nto'o ko te kau'vī ko. Xoo é kau'vī í ne, vata kutūni vá'a i nté koo kuinima i.

<sup>19</sup> Ini kuiníma kō, tsí di'na kuínima Xúva ko kō.



<sup>20</sup> Te iō ñá ne, kaka'an ña: “Kakuinimá ko Xuva kō”, ka'an ña, ntá tsi ña ntío kue'en ñá ta'an ña ne, koó dā dovete kaka'an ña. Tē ña kakuinima ñá ta'an ña é kainí ña ne, ¿nté ntu koo kuinima ñá Xuva kō, tsí vata kiní ña ña? <sup>21</sup> Xtūví Xuva ko tū'un sá'á é kāda ntaa o: Xoó ña'a é kakuinima ñá Xuva kō ne, na kuīnima ñá ta'an ña di.

## 5

### *Kuvi vii o ni ñuxiví sa*

<sup>1</sup> Un ntíí ntíí ña'a ne, kuvi ña i'xá Xuva ko tē ntákuinti'xe ña tsí Jesuú ne, divi ña é taxnuu Xuva ko ña. Xoó ña'a é kakuinima ñá uva i'xá san ne, kakuinima ñá i'xá ña di. <sup>2</sup> Dukuān né, tē ntákuinima kó Xuva kō né, tē ntáde ntaa o é kaka'an ñá ne, dukuān ne, ini ó tsi ntákuinima kó i'xá mii ña Jēsuu. <sup>3</sup> Ntákuinima ntí'xe ko Xuva ko tē ntáde ntaa o é kaka'an ña. Tū'un e xtúvi ña é kāda ntaa o ne, ñá te xīdo víi. <sup>4</sup> Tsí un ntíí ntíí ña'a, ña e kúvi i'xá Xuva kō ne, kuvi vii ña nī é un ntí'í nuū i é kīni kaa é ió ñuxiví sa. Kuvi vii o, tsi ntaínúu ini ko Xuva kō. <sup>5</sup> Xoó ña'a é kakuinti'xe i tsí Jesuú ne, i'xá Xuva ko ñá ne, kuvi vii ña nī é un ntí'í é kīni kaa é ió ñuxiví sa.

### *Nuu i e ntántada ntaa iña I'xá Xuva kō*

<sup>6</sup> Dā kí'xi Jesucristu ñuxiví sa ne, ntute san ni níñí san xe'é kuenta. Ñá te da mii tsi ntūte san, tsí ntute ni níñí di. Mii Espíritū Sántū san kantada ntaa ña nee iña é nuu é ntaā i iña Cristú di. <sup>7</sup> Ntuní nuu i sá'a e ntántuntaa e dukún kán: Xuva ko nī ña é kaka'an o Tú'un ña ni Espíritū Sántū. Ntuni sá'a ne, uun tsi ña'a kuvi. <sup>8</sup> Ió ka uni núu i ntántuntaa ñuxiví sa di: Espíritū sán, ni ntūte sán, ni níñí san. Ntuni núu i san ntántudadii. <sup>9</sup> Kuīnti'xe ko tū'un é kántada ntaa ña'a san, ntá tsi tū'un é kántada ntaa Xúva kō ne, díí ka kue'e nuu á'vi i. Tsí kantada ntaa ña

kuenta iña I'xá ña. <sup>10</sup> Xoo é kākuinti'xe i I'xá Xuva kō ne, nuu tú'ūn é nuu é ntaā í nima ña. Xoo é ña kakuinti'xe i Xuva kō ne, vata te kāka'an ña tsí vete Xuva ko, tsí ña ni kuinti'xe ña é kāka'an Xúva ko iña I'xá ña. <sup>11</sup> Sá'ā ne, tú'ūn é ntada ntaa Xúva kō: é tā'xi ña é kuntoo o ni ña ntii dañu ntūví te kuinti'xe ko I'xā ña. <sup>12</sup> Xoo e túvi ni'i i I'xá Xuva kō ne, e ní'i ña ntuvi vā'á iña ña nta'a Xúva kō. Xoo é ña tuvi ni'i i I'xá Xuva kō ne, ña túvi ntuvi vā'á iña i nta'a Xúva kō.

*I'a nt'i tú'ūn sa'a*

<sup>13</sup> Kade vá'a u sá'a iña nto, ña ntākuinti'xe I'xá Xuva kō, vata koo é kīni vá'a nto tsí e tá'xi Xuva kō é ni'i nto ntuvi va'á iña nto ntii dañu ntúvi.

<sup>14</sup> Ntaínúu ini ko Xuva kō, tsí ini o tsí katekú ña da ntaíkan o da nēé ka nuu i nta'a ña, vatā o ntío ña. <sup>15</sup> Te ini o tsí katekú ña é kāka'an ntā'ví ō ne, ini o tsí ta'xi ntí'xe ña da nēé ka nuu i é kākan o nta'a ña.

<sup>16</sup> Xoó ña'a é ini ña tsí kade ta'an ña é kīni kaa, uun kuetsi é ña kaxé'e doxi'í san ne, ka'an ntá'ví ñá kuenta iña ta'an ña. Kidáā ne, kué'e Xuva ko ntūvi iña ta'an ñá, tē ña te kuétsi kā'nu é kāxe'e doxi'í san. Tsí ió uun kuetsi é kāxe'e doxi'í san. Ñá te kāka'án u te ka'an nta'ví nto kuenta iña i sá'a. <sup>17</sup> Vata dá kade o é kīni kaa ne, ió kuetsí kō. Ntá tsi ña te un ntí ntí kuétsi san kaxé'e doxi'í san.

<sup>18</sup> Ini o tsí xoo ñá'a é nakáku ña nta'a Xuva kō ne, ñá ncho vii ka ña é kīni kaa. Tsí I'xá mii Xuva kō ne, kade ña ña kuenta. Ña túvi nēe nuu i é kīni kaa é kūvi vii ka é ña vá'ā san ni ña. <sup>19</sup> Ini o tsí xo'ō ne, ntáduku ntée o Xuva kō. Ntá tsi ña ntáduku ntée ñuxiví kīni kaa sá ne, da miī e ntáde ña é kāka'an tó'ō e ña vá'ā san. <sup>20</sup> Ini o tsi e xée I'xá Xuva kō ne, tā'xi ña é kūtuni ko xoo é Xuva nti'xe kō. É ntuvi uun tsi o ni ñā é Xuva nti'xe kō, ni I'xā ñá

Jesucristu. Dìvi ñā é Xuva nti'xe kō né, kata'xi ña ntuvi vā'á iña ko ntii dañu ntūvi. <sup>21</sup> I'xá miī kó, kuenta vií nto é ña kunuu iní nto xoo é ña te Xuva ntí'xe kō. Sá'a tsī é kā'án u ni ntō.

**Tū'ún xuva kō vatā ó ntáka'an ña ñuú  
Coatzospan  
New Testament in Mixtec, Coatzospan  
(MX:miz:Mixtec, Coatzospan)**

copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

**Copyright Information**

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Coatzospan

**© 2003, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

8f775598-56d9-56fd-966e-15e054d2f275